

Xurxo Ferrón Vidán, concelleiro de SumaRibeira dirixese ao Alcalde e Corporación Municipal para que sexa incluída na orde do día do vindeiro pleno municipal a Proposición seguinte:

Construcións obsoletas de telefonía e electricidade

Son moitas as contribucións ao feísmo urbanístico que proliferaron ao longo de todo o noso concello nos últimos decenios

- Edificios inspirados exclusivamente no enriquecemento das promotoras
- Permisividade, que en ocasións as veciñas consideraron e consideran selectiva, ante o incumprimento das normativas vixentes.
- Falla de sensibilidade e preocupación por unha mínima harmonía estética.

É certo que algúns espantallos urbanísticos teñen difícil solución a curto e medio prazo, pero pensamos que nos últimos trinta e pico anos de gobernos municipais do PP (ou de AP), moi pouco se fixo á hora de executar solucións factibles que eliminasen ou paliasen algunhas desfeitas consolidadas na actualidade.

Conscientes da complexidade que requiren algunhas actuacións, e pensando que pode ter interese práctico e ilustrativo centrarse en casos concretos, queremos esta vez facer fincapé nalgúns elementos que pensamos que contribúen a afean o noso concello, e que cremos que é factible erradicar ou diminuír notablemente a moi negativa intrusión que supoñen na consecución dunha Ribeira máis atractiva e amable para todas.

Nesta liña de concreción queremos centrarnos nos seguintes exemplos de contribución ao feísmo sobre os que consideramos que se debería actuar á maior brevidade posible:

- Perduran aínda diversos e numerosos espantallos urbanísticos (ímonos centrar nos non residenciais) na maioría das nosas parroquias, que afean ou limitan o atractivo do seu entorno e dan imaxe de deixamento, como é o caso de certas estruturas que na súa maioría non están operativas, e que semella que elas mesmas reclaman intervencións que suprima ou reduzan o seu negativo impacto estético e no desfrute das veciñas. Pertencen a un tipo de construcións, violentadoras do desfrute e harmonía, que **no seu día tiveron xustificación para a cobertura dos servizos de telefonía e electricidade**, pero que se permitiron levantar tamén sen un mínimo decoro. Cremos que actualmente poden ser suprimidas, trasladadas ou reducir significativamente o seu volume, pois presentan unhas dimensións inxustificadas e inxustificables coas solucións tecnolóxicas que se veñen desenvolvendo hai decenios, tanto no campo da informática como das infraestruturas que facilitan as comunicacións e o transporte de enerxías.

Neste amplo capítulo, sobre o que pensamos que se debería actuar, queremos nesta ocasión poñer o punto de mira nas parroquias de Palmeira e Corrubedo.

Pensamos que un sobranceiro exemplo de impertinencia urbanística o encontramos na **Praza do Rueiro de Palmeira**, que por certo se encontra moi próxima á importante e custosa intervención de racionalización urbana que está proxectada nesta parroquia. Sería unha interesante e necesaria contribución ao restablecemento da súa harmonía actuar sobre a **construción que unha empresa de telefonía posúe nesta praza**, ocupando unha parte considerable da mesma.

Temos a grande sorte de poder desfrutar todas e todos do casco histórico de Palmeira, que salienta entre os de maior encanto da Ría de Arousa, non só polo seu privilexiado enclave xeográfico senón tamén polo seu atractivo como pobo de raizame mariñeira, no que destaca, entre outros elementos,

a importancia arquitectónica do seu centenario porto así como as súas rúas e algunhas das casas de estilo mariñeiro que aínda se conservan total ou parcialmente. Laiámonos de que no seu tempo non se tivera feito un plan de conservación do seu entorno paisaxístico e arquitectónico, para así defender patrimonio que está vila posuía (casas mariñeiras, e algún que outro hórreo que voou da horta da parroquia).

- Seguindo a mesma liña queremos tamén referirnos ás **torres levantadas no seu día para apoiar infraestruturas de subministro de luz ou teléfono** e que rachan as vistas, ás veces dende longas distancias. Entre estas consideramos que constitúe un exemplo lamentablemente sobranceiro a situada a carón do emblemático e atractivo **entorno do faro de Corrubedo**, convertido recentemente en punto de partida do Camiño da Orixe.

Hai perdas urbanas históricas que hoxe son irreparables, pero temos a obriga de actuar onde si é factible. De acordo co exposto presentamos as seguintes propostas:

1. Iniciar os trámites necesarios para suprimir a construción citada situada na Praza do Rueiro de Palmeira. Sempre e cando isto non fose legalmente posible, realizar as xestións necesarias para reducir en todo o posible as súas dimensións e impacto visual.
2. Iniciar os trámites necesarios para erradicar a citada torre situada preto do Faro de Corrubedo.
3. Elaborar un plan de actuación a medio prazo, no que se contemplan as estruturas do tipo das dúas descritas que, en base ao seu negativo impacto na harmonía e calidade de vida, e na viabilidade das posibles solucións, aconsellen actuar na humanización do concello.

Asinado: Xurxo Ferrón Vidán. Concelleiro de SUMA RIBEIRA.

En Ribeira, a doce de xuño de 2022.

Nota: achéganse fotos relacionadas cos puntos 1 e 2 desta Proposición



